

東甌金石志

東甌金石志卷十二

嘉善

戴咸弼

鼇峰

纂輯

瑞安

孫詒讓

仲容

校補

無年代古刻

範元甄文

□□□□□七月廿日東揚

州永嘉郡吉遷里範元自建

右甄厚一寸六分長一尺三寸五分廣六寸二分

右側存文凡六字左側文凡十一字出永嘉東門

內華蓋山今藏百晉精廬

孫詒讓案此甄兩側並有文紀年在右側已夷漫

不可辨以永嘉郡隸東揚州考之必宋梁陳三朝

物也宋書州郡志孝建元年以揚州之會稽東陽新安永嘉臨海五郡爲東揚州大明三年罷揚州爲王畿而東揚州直云揚州八年罷王畿復立揚州揚州還爲東揚州前廢帝永光元年省東揚州併揚州又梁書武帝紀普通五年分揚州江州立東揚州太平元年省又陳書文帝紀天嘉三年六月以會稽東陽臨海永嘉新安新寧晉安建安八郡置東揚州隋書地理志會稽郡梁置東揚州陳初省尋復平陳改曰吳州是東揚州之置始於宋孝武歷梁陳省復不常至隋平陳始不復置此觀雖元號已缺要非陳以後作殆可無疑吉遷里亦六朝里名之塵存者可補郡縣志之闕範元似人

姓名然姓氏書並無範姓所未詳也

安固左尉甄文

安固左尉廣平

冢□□□

右甄厚二寸二分廣六寸二分中斷長不可計上
端文凡六字下端漫滅廬存一冢字餘不可辨出
瑞安西門外西峴山麓今藏百晉精廬

孫詒讓案安固卽今瑞安縣治宋書州郡志安固
今吳安陽晉武帝太康元年更名晉書職官志縣
大者置令小者置長尉大縣置二人次縣小縣各
一人据世說輕詆篇劉孝標注引孫統集敘有晉
安固令高柔則晉時安固爲大縣當置二尉蓋左

右各一人宋齊以後悉沿其制

唐六典李林甫注後漢置尉上縣二

人主捕盜賊三國晉宋之後並因之

至隋改縣尉爲縣正詳隋書志始

廢此官此甄文隸法方勁必晉宋物無疑廣平蓋其籍貫惜姓名無考

永嘉郡永寧縣甄文

永嘉郡永寧縣

右甄厚一寸九分廣六寸中斷長不可計右側文凡六字出永嘉生薑門外松臺山麓今藏百晉精廬

孫詒讓案甄上下並爲華紋中爲三方匡每匡二

字書勢絕古樸惜無年月永寧之隸永嘉郡始晉

明帝太寧元年

晉書地理志太康元年分隴海立永嘉郡統永寧安固松陽橫陽四

縣 歷宋齊梁陳並仍其制至隋平陳郡廢隸梧州
又改永寧爲永嘉唐高祖武德五年復置永寧縣
而仍隸東嘉州至元宗天寶元年改溫州爲永嘉
郡而永寧縣已省則此縣必陳以前物也

永寧縣殘甌文

永寧縣

右殘甌厚一寸六分廣六寸三分下半斷失長不
可計右側存文三字反書出永嘉東門內華蓋山
孫詒讓案永寧縣卽今永嘉縣治續漢書地理志
永和三年以章安東甌鄉爲縣宋書州郡志作
永建四年立歷
吳晉宋齊梁陳隋並仍之至隋文帝平陳改曰永
嘉唐高祖武德四年又分永嘉永寧爲二縣太宗

貞觀元年又省永嘉縣

見隋書

此甄並係正書不

類漢晉物疑六朝以後作也

永嘉郡安固縣甄文

永嘉郡安固縣薄馬口

右甄厚一寸七分長一尺六寸四分廣六寸五分
右側文凡九字並反書出瑞安西門內西峴山顛
今藏百晉精廬

孫詒讓案安固之屬永嘉郡亦始於晉太寧元年
歷宋齊梁陳並同至隋平陳廢郡屬梧州縣亦并
入永嘉縣唐高祖武德五年復立安固縣而仍屬
東嘉州玄宗天寶元年復以温州爲永嘉郡肅宗
乾元元年復爲温州此甄無年月不知何時所作

簿蓋卽主簿馬其姓也晉書職官志縣有主簿宋齊梁陳隋唐並因之說文竹部無簿字其見於漢石刻者若張納白石神君韓勅禮器夏承李翕西狹頌武氏石室畫象諸碑主簿字並作薄是其例也

五官殘甄文

五官

右殘甄厚一寸七分上下斜斷長廣並不可計存文凡二字出永嘉東門外華蓋山今藏百晉精廬孫詒讓案此甄殘缺庫存二字官作官與篆法合續漢書百官志載郡國有五官掾宋書百官志載元嘉四年置郡官屬亦有五官掾永嘉在晉宋六

朝並爲郡治此甌蓋卽郡吏冢甃紀其官秩也

晉甌甌文

晉甌

右甌厚二寸一分長一尺四寸八分廣五寸八分
右側文凡二字出瑞安十二都東山舒獻臺山今
藏百晉精廬

孫詒讓案甌文隸法甚方整當爲晉物甌蓋卽范
之借字甃范紀國號而無年月亦甌文之刼例也
一千五百古泉甌文

一千五百

右殘甌厚二寸二分廣六寸四分下半斷失長不
可計右側存四出泉文一中有一千五百四字出

瑞安東門外隆山今藏百晉精廬

孫詒讓案此甄爲四寸泉一徑二寸許文曰一千五百攷各史及洪遵泉志並無此泉六朝以上泉文皆篆書此獨正書亦殊不類疑甄匠以意爲之無所摹放也

五五古泉甄文

右甄厚一寸八分廣六寸三分下半斷失長不可計右側存四出泉文一從橫各爲五五二字並篆書出瑞安東門外萬松山麓今藏百晉精廬

孫詒讓案甄文四出泉徑一寸許四旁並有五五二字洪氏泉志奇品門所圖四五泉與此正同惟無四出文耳洪氏云此錢顧煊所載四旁皆篆書

五字董道謂之四五錢則梁以前已有此泉矣

劉授錢甄文

□□孤子劉授作

右殘斜甄右側厚二寸四分左側厚一寸三分廣七寸右側存文凡七字並反書出永嘉東門內華蓋山今藏百晉精廬

李氏殘甄文

廿五日李氏

右殘甄厚二寸廣五寸八分右側存文凡五字出永嘉生薑門外松臺山麓今藏百晉精廬

陳顯祖殘甄文

陳顯祖建母□

蓋竹陳顯祖母蘇氏

右殘甄厚二寸一分廣六寸九分下半斷失長不可計右側存文六字下脩文八字並反書出瑞安廿四都小奧山今藏百晉精廬

周君貴殘甄文

周君貴

右殘甄文二寸一分廣六寸下半斷失長不可計上脩文凡三字右側有文已漫滅細窠似太元字
出永嘉西門外西山今藏百晉精廬

孫承祖殘甄文

孫承祖

右殘甄厚一寸八分廣六寸四分下半斷失長不

可計上端文凡三字出瑞安廿五都下村山今藏
百晉精廬

車懷仁殘甌文

車懷仁

右殘甌文一寸七分斜斷長廣並不可計上端文
凡三字出瑞安東門外萬松山麓今藏百晉精廬
鳳字殘甌文

鳳

右殘甌厚二寸廣七寸六分上端爲蟠螭文右旁
一鳳字八分書出瑞安北門內尼菴牆間今藏百
晉精廬此甌華紋絕精鳳字隸勢飄逸與漢甌文
相近惜無年月可攷

衛字殘甌文

衛

右甌厚二寸二分廣七寸八分下半斷失長不可計右側華紋之間有一衛字出瑞安十二都東山舒獻臺山今藏百晉精廬

陳氏甌文

陳

右甌厚一寸八分長一尺六寸三分廣七寸一分上端有一陳字出瑞安廿四都小奧山今藏百晉精廬

棲霞寺塔甌文

棲霞寺塔塼

右殘甃厚二寸三分廣七寸三分上甃文凡五字
出瑞安西門內西峴山今藏百晉精廬

孫詒讓案棲霞寺卽今悟真寺在西峴山麓嘉靖
瑞安縣志載馬湘捨宅建賜名棲霞宋祥符改今
額据此則栖霞寺建於唐至宋初已改名悟真寺
今寺無塔蓋圯廢已久故舊府縣志並不載此當
是唐初建寺時造塔甃也

謝客巖題字

謝客巖

右謝客巖三字在郡城南門外飛霞洞之右巖石
特起壁立如竒碑高一丈四尺上廣五尺八寸下
廣七尺九寸三分面平如砥大書深刻篆法蒼勁

異常謝字徑二尺九寸四分客字徑三尺五寸六分巖字徑四尺九寸舊浙江通志云舊傳謝靈運讀書故址巖石上鐫白雲春草四字天下名勝志積穀山下有飛霞洞又有謝客巖謝靈運書白雲曲春草吟於石崖今已蕪沒惟謝客巖三篆字尙存陸龜蒙小名錄靈運小字客兒初錢唐杜明師夜夢有人來入館是夕靈運生於會稽旬日而謝元亡其家以子難得遂送靈運於杜治養之十五年還郡故名曰客兒其叔父混敬賞之常呼爲阿客此巖題字篆法絕精不讓李少溫所書倪翁洞黃帝祠宇諸刻然不知何人所書據吳越錢鏐題記稱康樂巖則當時已以此巖屬之謝公疑唐人

遺跡也

西峴山題字

紫霞山

西峴山在瑞安城西馬真人湘於此鍊丹常有紫霞覆其居一名紫霞山石壁磨崖有紫霞山三大字正書紫霞二字徑三尺一寸山字徑二尺一寸相傳卽馬真人書筆意譚嚴與鍊丹臺詩字迥別旁有明守備劉隆題名或疑卽劉隆所書

白石山題字

第一山

右刻在樂清白石山玉虹洞口行書第字徑五尺四寸山字徑二尺六寸有鸞翔鳳舞之勢樂清縣

志白石山在縣西三十里相傳爲十二真人所居
名白石洞天宋太平興國閒羽士李少和居此太
宗書第一山賜之字鐫玉虹洞口今未泐温州府
志仙釋李建中李少和行狀永嘉人世居大羅山
聞白石洞爲鬼墟曰吾嘗東望彩雲覆其上必佳
山也乃獨造其頂宴坐鬼神咸遁太宗真宗屢召
對賜予甚厚仍賜白石巖額當卽指此二志並以
爲宋太宗御書然無確據姑附於此

龍渠雁山磨崖

天

開

圖

畫

龍渠

右在樂清雁山龍鼻洞下大石上四字平列草書
天字徑二尺六寸五分開畫兩字徑三尺一寸圖
字徑二尺九寸龍渠二字徑二寸八分筆致圓渾
跳脫龍渠未詳何人明王思任慎蒙兩遊記均以
爲晦翁書豈未見題款耶龍鼻洞左壁又有正書
龍渠二字徑三寸

雪洞殘刻

廣雁山志云雪洞在靈峰石一望空曠內石壁有
古書數十行石泐不可辨可辨者夏啓伯太守建
寺等字今洞下道茀不可登余曾遣奴子躡險而

上尋討未獲也

靈峰洞題記殘字

五月十一日客宿□

清舟中夢至□山

高/□諸峰□□

俱現

佛身既至羅漢洞中

恍符宿夢因向

大士前求□許

出家立志定□

續□□山

□卽遊頓□□有

□佛身始信多□

□記長二不昧本來

人□□虛□□水□

懸石洞中有一線天

大□□□□□□□

□□訂出家緣

□□四年□月十三日

右在樂清雁山靈峯洞左壁高處前爲應真佛座
莫可階梯字纔寸許遠鏡窺之薜花斑駁乃升佛
前香案帶縛長竿遙洗之字跡隱然然相距猶八
九尺睨而視之錄其可辨者如右雁蕩詩話云東
甌遺事載秦檜嘗夢至一洞羣僧環坐後經雁山

羅漢洞詭云我前夢抵此石室羣僧環坐曰尚憶
此否吾瞿然悟身爲諾詎羅僧謂吾世緣未了姑
去今觀此始知所夢因築了堂爲詩以紀有欲了
世緣那得了句後王梅溪以詩譏之云何人夢石
室妄誕誇一時那能了世緣未免貪嗔癡名山誤
見汚公議安可欺願借靈湫水一洗了堂碑等句
此刻所紀曰恍符宿夢曰訂出家緣與檜語吻合
疑爲老秦手筆四年上當是紹興檜自二年罷相
後尋復以資政殿學士知温州當紹興四五年間
年月後尙有一行文已磨滅或卽檜姓名爲後人
所深惡而鑿去之耶

金星溪題字

金溪石

右題字在樂清丹霞山絕壁上樂清志丹霞山又名白鶴山晉張文君隱此蒔苦竹數十頃西南崖飛瀑雙懸如噴玉屑潭大數畝下有金星溪雙瀑潭北石崖有巨人蹟上書金溪石三字隱隱可觀丙子九秋余自雁山回訪之字可徑二尺許苔蘚封蝕仿佛是隸書志又載文君居白鶴山下鍊丹王羲之慕而訪之文君以餘藥擲水遁入竹中羲之不獲見而去至今溪石有金星之點大抵好事者附會不足據也

劉公谷題字

劉公谷

右刻在樂清湖濱山篆書三字徑二尺四寸公字
畧小意致奇放志云兩崖閒有巨石如厂覆潭上
宋邑宰劉默有惠政嘗遊憩於此因名劉公谷石
上篆劉公谷三字默宰樂清在紹興年王十朋詩
注沂州人有政聲此三字未詳何人書

黃石公洞碑

黃石公贊 篆額

素書名節高赤松隱跡僻

君師者王道之始也景仰

先生之風不見其人惟此

黃石惟斯人也古今莫敵

徐引之按右碑在平陽鳳山黃石公洞內高八尺

寬二尺七寸正書徑三寸五分篆額四字兩行寫
字徑四寸洞有道者像碑立像前不知何人所書
龍鼻洞磨崖九種

范公量來

甲午十月十九日

右在樂清雁山龍鼻洞左壁葉宗大題名之右正
書已下共九種年代均未詳俟考

觀音崑

嘗來

范漸正

右在范公量之右左文正書

倪本遊

呂公衮

右在李復圭題名之上左文正書仲容云公衮疑是藍田呂氏丞相大防諸子姓

丁元

來

馬廷

右在洞左壁沈括題名左偏之下正書

虞寬

右在沈括題名之下正書

劉弼來

右在洞左壁正書

丙寅十一月七日

張仲思

遊此男蒙

右在洞左壁鄭詳題名左偏之上正書

姜守中

來

右在洞左壁郭樛題名之前正書

龍兮龍兮胡爲於此施涓滴願興雲

布雨九天上使四海蒼生受恩澤

右在洞右壁草書二行後有款字爲元人玉連赤

不花題名界線所混其爲宋人所題無疑

東塔院石佛題字兩種

弟子張茂滋并妻陳氏十三娘奉爲

缺

右第一種

都勾當造塔弟子何綺支宗雅爲四恩三有開
泗洲大聖普照明覺大師洎二侍者永充供養

右第二種

右在樂清東塔院前照壁上現存兩座中鐫坐佛
旁列款識樂清志東塔山又名文峰宋熙寧間邑
令葛逢以大尖山石塔改建於此此二種疑亦同
時所造都勾當造塔弟子云云蓋造塔後而又鐫
佛供養也

蓋竹洞題字殘刻

長耀寶光

右在樂清蓋竹山石壁映日觀之不甚明朗正書
徑一尺二三寸光字下石泐宋林一龍蓋竹洞天

記巖石散峙或如列屏或如厦屋或如城壁最外
一大石側下有穴斜入湯君達作記號爲寶光長
耀洞天引司馬子微說爲仙人丹邱子所治其事
甚異台州臨海縣亦有蓋竹山嘉定赤城志引輿
地志一名竹葉山中有洞名長耀寶光之天洞淵
集所謂第十九洞天也雲笈七籤云仙人商邱子
治之按道藏洞天記指台州蓋竹山此處疑爲好
事者所題

附存

葛稚川仙壇山磨崖

陰洞泠泠風佩清清仙

居永翺花木長榮

葛稚川

小岩樓

右磨崖在平陽仙壇山巖石上詩二行首行九字
次行七字款題葛稚川一行三字草書徑三寸五
分至六寸不等小岩樓三字平列篆書小字徑九
寸五分岩字徑一尺一寸八分樓字徑一尺二寸
七分鄭緝之永嘉郡記陽嶼有仙石山頂上有平
石方十餘丈名仙壇壇陬有筋竹歲鬩青翠風來
動音自成宮商石上淨潔初無塵籀相傳云曾有
却粒者於此羽化故謂之仙石平陽志古蹟門載

仙壇山有葛翁小岩棲石牀丹竈巖上刻葛洪詩
丁丑四月僞兒游南雁蕩先登仙壇山訪之寺僧
不知壇在何所并不知有小岩棲僅引至半山觀
仙人足跡乃窮高極遠竟日不可得自仙姑洞歸
再求之雲樹蒼茫意稍倦步出寺後循澗行風泉
入耳如鳴琴籬外多亂石家童披荆深入忽見叢
薄中巨石上露一字遙呼童使認亦以有字跡告
越澗趨視大石高一丈六七尺細審是岩字搜其
旁又得二字則小岩棲也岩左五六步一石及肩
苔花滿繡掬洗數四字字明了則題詩十六字在
焉後有葛稚川三字筆意縱逸飛動有不可羈勒
之勢惟石質粗不受椎搨稚川仙迹徧天下然往

往附託不可究詰此刻詩格字體均不類西晉人
無由定其真贋故附列於此

馬自然西峴山磨崖詩

昔日曾隨魏伯陽經年醉臥紫金牀東皇道我多情
嬾罰向人間作酒狂

何用燒丹學駐顏靜非城市鬧非山時人若覓長生
藥對景無心是大還

右石刻詩在瑞安西峴山煉丹臺東面巖石上行
草書筆意放逸相傳爲馬真人所題嘉靖瑞安縣
志馬湘字自然杭之鹽官人至安固卜居西峴山
下每有紫霞覆其居復於峴山周圍鑿二十八井
以厭鬱攸之患遂捨所居爲寺名棲霞又與其徒

王延叟鍊藥於松山西壑有雙鶴翔舞一日跨鶴
上昇今丹竈井曰具存又載湘自吟詩二首卽此
孫詒讓案咸淳臨安志方外門載馬自然名湘鹽
官人大中祥符元年卒葬於其家之東園明年東
川奏劍州梓潼縣道士馬自然白日上昇帝命杭
州發其冢視之止存竹杖据此則湘乃北宋人然
又載其訪常州刺史馬植會飲事攷馬植乃唐宣
宗時人大中三年由中書侍郎罷爲太平軍節度
使又貶常州刺史湘旣與植同時則不得至宋大
中祥符年開始卒不審潛志何以自相逢伐豈自
然本卒於唐大中九年潛志誤書大中祥符耶至
嘉靖瑞安志萬厯温州志並以湘爲蕭梁人則大

誤矣此詩刻不著年月疑亦道流依託爲之未必自然真跡也

呂巖題巖菴石壁詩

山中樓閣倚雲端極目烟霞萬里看法鼓應雷通世
界禪心映月照蒲團風吹洞草三春暖雨潑巖花六
月寒惟有紫微星一點夜深長挂月欄干

瑞安志巖菴在大密山門峯巒奇絕遊蹤罕至呂
純陽有題壁詩此胡孝廉玠錄示云草書不知何
人所刻

第一山題字

第一山

右在瑞安第一山麓大石上石高一丈二尺餘肩

寬一丈四尺五寸上豐下殺行書第字徑四尺五寸山字徑二尺瑞安縣志在集雲山左支宋米芾書第一山三字刻於石石高一丈一尺廣九尺厚一尺七寸上銳下平偃仆田閒百四十年乾隆乙巳歲邑人朱有光朱泮鳩工重豎字縱逸奇偉相傳以爲襄陽書杭之紫陽山陝之終南山江南之盱眙縣皆有之大半後人摹刻而此則無款不知何時刻也

佚目

晉升平甄文

馮登府浙江甄錄晉升平甄長一尺厚一寸二分文曰升平二年太歲庚午九月十七日潘氏墓分

書如曹景完碑上端二篆文曰晉虎案升平二年
當是戊午甄誤書出永嘉達受藏二

孫詒讓案右甄僧達受所藏云出永嘉今未見

陳天康甄文

釋支那息心堂指源集東甌資福寺固辯道琛法
師溫之樂清彭氏子出家於正洪寺母夢紫氣縈
身而生十八登戒從息菴於法明寺一聞便領法
華三昧建炎三年車駕幸永嘉有旨以林靈素故
居爲資福院丞相呂頤浩以師應詔賜號固辯大
師山苦無水鑿井得古磚有天康字泉涌其下

天康陳文
帝年號

唐李邕僧元覺神道碑

宋王象之輿地碑目在永嘉縣之淨光先天寺元
葬於是山有括州刺史李邕所作神道碑

高僧傳元覺字明道俗姓戴永嘉人總角出家遊
方詢道謁韶陽能禪師而得旨焉先天二年於龍
興別院端坐入定殯於西山之陽攷萬厯府志載
邕神道碑云無證無修不離此心而得佛或默或
語未嘗有法以示人世稱宿覺禪師自六祖以來
禪師頗衆顯者三人南岳懷讓源清行思永嘉宿
覺也淨光寺舊在郡城松臺山明時寺廢碑亦無
存

淨光尼元機圓明塔碑

輿地碑目在永嘉縣之淨居尼禪寺其碑先天中

立

案萬厯府志元機瑞安人宿覺禪師女弟也咸通間築菴大日山坐禪後往淨光寺倒立而化宿覺偈曰汝生也顛倒死也顛倒乃仆一夕大雷電極忽不見尋之在大日巖竇因名其巖曰機巖案高僧傳謂宿覺示寂於先天二年此則說偈於咸通已後年代先後不合疑不足據

仙巖四瀑布詩

趙明誠金石錄路應等唱和行書貞元七年三月撰

案路應見府志職官代宗時任據寶刻叢編此刻在貞元七年攷新唐書路應傳貞元初以著作郎

出爲虔州刺史韓昌黎集路公神道碑刺虔州加
尙書屯田郎中遂臨於溫則由虔移刺溫州決非
代宗時當云德宗時任四瀑布詩不傳仙巖之瀑
以梅雨龍鬚兩潭爲最勝雷潭亦有瀑其一卽玉
函潭今人不知有四瀑布故附錄於此

仙巖陀羅尼經幢

潘耒金石文字記補遺尊勝石幢在處多有余所
見溫州仙巖寺大中年刻皆完好

釋佛彥仙巖寺志湖石塔唐宣宗大中十四年建
檀護俱唐時官職八面刻陀羅尼經歷今千四百
年苔蘚不生宛然如新眞異蹟也

右經幢在瑞安仙巖寺今橫臥寺前三面陷入土

內遠望隱有字跡卽之渺不可得寺僧相與轉觀
面面皆然洗刷再三僅得福田二字及一仲字正
書徑六分許筆畫細如遊絲轉瞬卽隱立五步外
映日光諦窠石上見有低窪之跡約十二三行由
字處曾受雕鐫故凹凸未平也仙巖寺志修於康
熙二十四年乙丑似當時陀羅尼經檀護官職猶
有可見及今未二百年何以滅沒如是間十數年
前此石全埋地中得非山氣鬱蒸土花侵蝕故耶
攷宣宗大中十三年己卯懿宗咸通元年庚辰大
中止十三年而懿宗改元在庚辰之十一月此云
大中十四年當在十一月已前然距康熙乙丑僅
八百二十五年志稱千四百年誤其製乃經幢俗

名曰湖石塔亦誤也

置玉清觀制

諸道石刻錄乾寧四年

寶刻叢編引

右見宋陳思寶刻叢編萬厯府志玉清觀在永嘉
建牙鄉丁么西華洞天唐咸通閒建昭宗賜御書
玉清觀額

玉清觀記

姜準岐海瓊談建牙鄉玉清觀御史中丞口譔記
節度使程詢古書

石室碑

輿地碑曰在永嘉縣磨符鄉大羅山之石室上有
石夫人及古石碑在天柱寺

海濤志

集古錄唐寶叔蒙謨其書六篇一日海濤志二日
濤厓三日濤日時四日濤期五日朔望體象六日
春秋仲月漲濤解余向在揚州得此志甚愛之張
於座右之壁冀於朝夕見也已而夜爲風雨所壞
其後求之凡十五年而復得斯本以示京師好事
者皆云未嘗見也

集古錄曰海濤志濤厓濤日時濤期朔望體象春
秋仲月漲濤解凡六篇唐寶叔蒙謨其說以月朏
朏候濤洑之進退并寶氏濤日時疏一篇越州刺
史孟簡撰皆陶慙書朱巨題額不著刻石年月在
温州寶刻叢編十三引

司空圖仙巖寺銘

巖之巔森戟插天中宅靈仙瀑之作風幹洞壑地涌
山鑿越之裔陬之隅人逸而腴某其師某其牧寺圯
而復

輿地碑目仙巖寺碑銘司空表聖文

案司空圖並未至永嘉惟藝文內有寄崔少府旅
寓永嘉詩又表聖送草書僧歸楚越序末云永嘉
西岑康樂勝游之最是行也爲我以論詩一篇題
於絕壁今此碑已佚其銘見萬厯府志豈亦其寄
題者耶又按康熙府志插作饒漁作洵隅作岫未
詳孰是

宋米芾龍泉院記

岐海環談米元章書周侃龍泉院記鐫諸石後爲黃文簡公昇去不知所終

吳說書證道歌

岐海環談宋吳說書證道歌於淨光禪寺

永嘉本蘭亭叙

桑世昌蘭亭考永嘉本字大行闕并刻乾封二年懷仁集右軍及序有秦吳三跋後序乾封二年十月二十七日宏福寺沙門懷仁集寫晉王右軍書

蘭亭脩禊前敘世傳隋僧智永臨寫後敘唐僧懷仁素麻紙所書共成一軸永嘉太守待制程公一賞歎刻之樂石與天下後世知有蘭亭筆法者共

之虞褚輩多臨蘭亭而永師實右軍末裔頗能傳其家法故此書活動宛有迴鸞返鵠之意較之世間石本何啻如牛毛耶懷仁唐書僧號能集右軍書者首尾映帶誠爲尤物錢塘吳說

蘭序考

岐海環談永嘉蘭亭刻本宋理宗收入內府列在丙集後歸賈平章繼歸錢塘謝氏陳仲醇云永嘉蘭亭是智永臨寫宋紹興間太守程邁刻真郡齋筆勢雖縱逸而未免失真首行會字亦全未有孫綽後序是唐乾封二年僧懷仁集書又有吳傳朋題識具在

薛師石先賢祠堂記

岐海環談王綽謨先賢祠堂記瓜廬薛師石以家

書刻石於郡庠

元黃潛容成道院記

岐海璣談黃公潛謨容成道院碑記不知何人書
丹字亦俊雅以上諸蹟久已埽矣

趙孟頫陳氏世德碑

岐海璣談西山虎跑泉有陳氏世德碑趙文敏筆
也湖石穹隆載以龜趺居民不奈官府敲刷下端
鏡壞十餘字且屹立荒墟雨暘淋漓日漸損泐惜
哉

收臧

周襲君孟

正月廿七日

止穆王孟用

恒子

釋文

佳惟正月初吉要君白伯口自亡作歸饋孟用牌

祈發眉蓋壽喪疆子二孫二寶是尙

孫詒讓案右銅孟高建初尺五寸七分口圓徑一尺六分兩耳高二寸八分有珥形制與宣和博古圖所載周季姜孟略同韓非子外儲說孔子曰爲人君者猶孟也民猶水也孟方水方孟圓水圓則古孟有方圓二形此孟與季姜孟形皆同所謂圓孟也孟徧體爲蟠螭雷回文糾互透遺文闕又綴小乳以千百計與博古圖所繪周七星洗頗相類

文飾工綯足徵冶鑄之妙矣腹內陰款七行爲文
廿有八又重文二宋駁其文蓋爲嬰君所作與卽
要之異文說文曰部身中也象人要自臼之形
从臼交省聲古文作嬰此作嬰卽嬰之省蓋要字
篆文以象形而兼齠交聲古文作嬰則从女从腹
省既非身中之形又無交省之聲於六書當爲會
意然其義殊不可說腹本从𠂔𠂔聲古文要字省
𠂔之𠂔而益以女此文作嬰又省其曰之半雖展
轉減省要於會意之例無鑿也要君稱君疑古國
名之不見於經史者白口蓋要君之字白卽伯字
古金文施
如下一字右旁似从旨阮氏積古齋錄鼎款識所
疾𠂔旨字作𠂔與此字右
旁相近而左半不能定其所从之形未詳其讀卽字

从食从帚亦字書所無以聲類求之蓋卽饋之異

文饋本从食貴聲此从帚者蓋从歸省聲貴與歸

古音同屬脂微齊皆灰部故先秦古籍歸饋二字

通段最衆

儀禮聘禮君使卿韋弁歸饗饋五牢鄭注今文歸或爲饋又聘禮既夕夫人歸

禮注

今文歸作饋論語先進詠而歸陽貨歸孔子

麻釋文並引鄭本作饋注云魯讀饋爲歸今從古

又微子齊人歸女樂釋文引鄭本作饋史記周本

紀以歸周公於兵所集解引徐廣曰歸一作饋

然則饋之變爲歸雖聲母不同而音讀無改古今

文字變易無方往往出許書之外此亦其一矣古

者凡進食謂之饋周禮膳夫凡王之饋鄭注進物

饋者湯沐之饋祭祀自進孰始而不薦腥爛者亦

謂之饋食特牲饋食禮注云祭祀自孰此嬰君自

作饋食之孟蓋以盛飯及湯漿者

說文皿部孟飯器也又既夕禮

兩村注研盛湯漿
打卽孟之借字

故謂之歸孟也銘末以彊尙二

字協韻與薛氏鐘鼎款識召仲考壺阮氏鐘鼎款
識史賓鉞並同光緒丙子家大人以鄂藩入覲
詒讓侍行得此於河南項城道次因案定其文字
之異者以資攷覽其餘省段之字金文常見不復
釋也

漢衛鼎

衛鼎容一斗二升重十斤圭兩 乙百介

釋文

衛鼎容一斗二升重十斤圭兩 乙百六

孫詒讓案右東漢衛鼎同治甲子秋得於安徽壽
州以建初慮僦銅尺度之器高五寸八分口徑七

寸二分兩耳高二寸五分三足高三寸六分惟蓋已失去度不可攷腹有稜純素無文脣閒鑿篆書大字十三大字旁又鑿小字三攷漢書恩澤侯表周子南君元鼎四年十一月封初元五年五月更封爲周承休侯綏和元年進爵爲公元始四年爲鄭公王莽篡位爲章牟公建武二年五月更爲周承休侯五年侯武嗣十三年更爲衛公後漢書世祖紀建武十三年二月庚午以周承休公姬常惠棟云當作武爲衛公續漢書百官志衛公建武二年封周後姬常爲周承休公十四年當作十三年改常此亦當作武爲衛公以爲漢賓在三公上郡國志兗州東郡衛公國本觀光武更名此鼎蓋建武初衛國始建時

所鑄祭器乙百六者紀當時鑄造之數神明之胄
克承享祀誠足嘉矣說文衛从韋市从行唐元度
九經字樣以爲隸省作衛今世所傳秦衛氏瓦已
有省牛者此款亦同秦漢人作篆亦多省筆不徒
隸也韋上从一者說文韋部載古文韋作此作
韋卽古文韋之變體字古金石刻所未見以文
義攷之當卽字大寫昉於兩京如王莽
侯鉦銘七作李翕夫人銘又作並已如此唐
石刻五經文字九經字樣所記字數六字則並作
陸與今流俗計簿正同湖南新陽唐袁滋所書元
次山唐顧銘六字作則
又以此鼎蓋以爲六猶之唐宋以後以漆漆
爲七漢魏人止作本从土聲此下从

二字鑿時偶省一筆如憲字中从丰漢隸多省爲
憲从土而夏承碑憲字獨作憲展轉減省失其本
始不足異也

五鳳甄文

五鳳三

右甄厚一寸八分長四寸七分廣四寸二分右側
存文三字篆書出嘉興已琢爲研左側及兩端並
刻張開福銘敘舊臧嘉興姚氏今歸瑞安孫氏百
晉精廬

五鳳三年甄研銘並敘

西漢金石刻歐陽猶未之見今儀徵相國得五鳳

三年甄

大興翁氏
釋三爲五

友人董玉山又於宅後培土得

殘甌文同儀徵惟三年較顯蓋一型所出頃從六
榆先生小雲東仙館見是研爰爲銘銘曰昔未見
六一翁今製研儀徵公誰與匹小雲東道光乙未
中伏日海鹽張開福石匏并書胡衣谷刻

孫詒讓案漢宣帝吳孫亮並有五鳳紀元此甌文
字奇古張氏定爲西漢物是也阮文達所得甌爲
海鹽張燕昌舊藏見兩浙金石志及翁方綱兩漢
金石記校此甌多一年字其釋三爲五則翁氏之
誤阮志錢宗伯載所作銘記亦本釋爲三字也

永建殘甌文

永建五

右甌厚二寸八分長一尺五寸廣三寸右側存文

凡三字八分書舊臧青田端木氏今歸瑞安周伯龍茂才龍永建爲漢順帝紀元其五年歲在庚午西涼李恂亦有永建紀元止于二年則此甄爲漢物無疑也

延熹甄文

延熹二年八月

右甄厚一寸七分長八寸八分 廣五寸六分右側文凡六字八分書臧陳仲珊廣文宗鼂家延熹爲漢桓帝紀元二年歲在乙亥

吳天冊甄文

天冊元年七月作

右甄厚二寸三分長八寸一分廣八寸上端文凡

七字入分書右側有大泉當千泉文一文並篆書
瑞安方雪齋教授成珪得於海寧孫以爲硯今歸
孫氏百晉精廬天冊爲吳孫皓紀元元年乙未大
泉當千泉吳大帝權赤烏元年所鑄見三國志吳
志及洪氏泉志

晉太康甄文

□泰以太康三年太□□壬寅□

右甄厚二寸長一尺五寸廣七寸二分右側文凡
十三字並八分書甄出安徽壽州今臧瑞安孫氏
百晉精廬

黃字甄文

黃以太康 缺

釐

右甄厚二寸長八寸廣七寸三分右側存文凡四字上端有一黃字舊藏青田端木氏今歸瑞安黃叔鏞大令紹第

孫詒讓案說文黃从田从𦉰𦉰亦聲此甄側文黃字上从𦉰𦉰文上从𦉰並與六書不合

元康甄文

口元康元年八月丁丑口山里施傳所作

右甄厚二寸長七寸二分廣五寸六分右側文凡十六字雙行正書甄出湖州已琢爲硯舊藏青田端木氏今歸瑞安孫氏百晉精廬馮登府浙江甄錄載湖州鈕氏所藏元康甄文與此略同元康上有晉字山里有茅字惟作上無所字蓋與此異

型漢宣帝晉惠帝並有元康紀元此甄文正書當是晉物

咸康甄文

咸康三年八月

右甄厚二寸六分長一尺九寸五分廣五寸右側文凡六字舊藏青田端木氏今歸瑞安林若川茂才向藜

永和甄文

永和十年八月口 葛嘿

右甄厚■寸■分長■寸■分廣■寸■分右側

文凡七字上端文二字反書舊藏青田端木氏今歸平陽張蔚文茂才蔚葛嘿蓋作甄者人名

升平殘甄文

晉升平四年三

學博士陳留郡

鄉周墟里周闡

活潯陽太守譙

逸字戊長小女

右晉升平殘甄道光二十年永嘉嚴茂才錦潛井
於太玉洞得之琢以爲硯今藏樂清陳璞生家計
字五行行各存六字第五行女字下存父字小半
八分陽文書徑六七分案宋葉夢得巖下放言云
法華山發古冢得碑皆有刻字曰晉升平四年二
月四日太學博士陳留郡雍邱縣都鄉周闡字道

舒妻活晉潯陽太守譙國龍圻縣柏逸字茂長小
女父晉安太守鷹揚男諱蟠字永時云云据此乃
周闡之妻柏逸之女墓也父晉陽太守鷹揚男諱
蟠者蓋闡之父故獨稱諱但不知妻活何義字畫
極分明無訛當是周妻之名今以此輒所存三十
字校之周闡上多周墟里三字潯陽上無晉字餘
並同惟彼云碑刻此乃輒文豈刻之於碑又范以
輒歟抑彼書碑本爲輒傳刻譌竇遂爲碑字歟夢
得謂得自法華古冢山在湖州烏程縣不知何以
流轉至此隸體氣韻疎逸獨具古趣非贋作也

補遺

宋故海陵太守趙公墓

東國名臣集卷十二
公諱伯言字公永

藝祖皇帝七世孫曾祖世雄故任崇信軍節度使知
大宗正事安定郡王贈太師追封淄王祖令鐐故任
左中散大夫守太僕卿累贈少師父子直故任寶文
閣直學士右通奉大夫天水郡開國侯致仕贈光祿
大夫累贈少師公以政和七年伯父中散子游遇

郊恩補將仕郎靖康元年授迪功郎調江陵府刑曹
掾建炎四年爲開州司戶六月用父宣和七年 覃
恩轉官循右從事郎紹興二年宣撫丞相張公浚辟
監雲安監鹽井五年爲浙西帥屬七年隨府罷任就
辟 巡幸隨軍轉運司幹辦公事是年改老江東帥
屬八年復爲浙西帥屬七月丁母夫人吳氏憂服所

監潭州南嶽廟十二年被薦削改右宣義郎知南劍
州尤溪縣未赴改除提轄行在雜買務雜賣場十五
年添差通判衢州六月磨勘轉右宣教郎是月以光
祿憂去官十八年尋倅三衢二十二年轉右通直郎
二十五年轉右奉議郎賜緋衣銀魚次年轉右承議
郎通判洪州二十九年轉右朝奉郎知邵州次年轉
右朝散郎三十二年覃恩轉右朝請郎明年以賞
遷右朝奉大夫隆興甲申 陛對稱 旨除知泰州
待次永嘉閏十一月戊寅以疾終于寓止之正寢享
年六十一公娶何氏秦鳳帥何公常之女大丞相張
公商英之外孫也男四人師德右迪功郎新紹興府
司理參軍師愈右修職郎新平江府司法參軍師石

東甌金石志

卷十二

三

右迪功郎新婺州司戶參軍師峴右迪功郎新江陰軍江陰縣主簿女三人長適何洪次適張蒙正李適吳万頃孫男二人希叔以公遇 初郊補將仕郎希虎未官孫女四人尙幼公性資純一泄官清謹去必見思於民大臣方有薦公者而公已云亡嗚呼仁者必壽理固可推天地造化之妙人事可得而參乎師得等方以誌銘属于舅氏何公勰謹泣血叙大略以納諸壙

右趙伯言墓誌舊在永嘉十四都雲霞輿近年爲刻碑匠陳姓取得磨去其文售與方觀察鼎銳刻且罔記殊可惜也今據郭熙堂將陳姓手拓本見貽補錄如右

孫詒讓案誌爲伯言子師德作其所述先代世系
官秩甚詳以宋史宗室世系表考之藝祖子燕王
德昭生舒國公惟忠惟忠生韓國公從諤從諤生
贈少師淄王世雄世雄生贈太傅諡恭惠令鏐令
鏐生贈少師子漪太廟齋郎子漸承務郎子湏儒
林郎子深累贈太師子洎子洎生伯言伯言生師
德師愈師碩師峴師德生希叔希虎與此誌正合
惟令鏐誌云贈少師表作太師疑隆興以後追贈
又伯言以下表並不詳其官秩可据此補其闕師
石表作師碩亦當以誌爲正子洎宋史有傳云字
正之父令鏐官至寶文閣待制子洎以蔭補承務
郎累官寶文閣直學士知西外宗正司京畿轉運

使卒此誌載令錄官左中散大夫守太僕卿與子
洎傳小異又子洎本傳不載所贈官据此誌知其
贈光祿大夫累贈少師並足補史文之遺漏誌又
云公娶何氏秦鳳帥何公常之女大丞相張公商
英之外孫也何常張商英宋史亦並有傳常字德
固京兆人中進士第累官右文殿修撰嘗以顯謨
閣待制知秦州故此稱爲秦鳳帥商英字天覺蜀
州新津人大觀閒除中書侍郎拜尙書右僕射誌
又云師德方以誌銘屬舅氏何公麒麟字子應王
十朋梅溪集與唱和詩甚夥据此誌當卽常子宋
袁說友成都文類載麒麟和張商英護國寺詩敘亦
稱爲外大父丞相可與此誌互證也伯言諸子及

諸女夫並無攷惟同治黃巖志載宋黃巖令有趙
師峴永嘉人當卽伯言季子蓋伯言僑寓溫州其
子姓遂著籍永嘉矣

吳譏壙誌

公姓吳氏諱譏字仁叔溫瑞安永豐里人也其先五
代唐時自閩徙今居曾祖達祖時中父舜明皆隱德
不仕公口紹興丁巳八月戊戌生娶同郡劉氏男二
人琦璘女一人后娶周氏女一人享年五十有二下
缺

孫詒讓案右吳譏壙誌殘石不知何時出土今在
瑞安三十一都馬嶼吳氏原石不知若干行今僅
存前七行行十三字第七行又僅存首一字餘並

缺佚誕郡縣志無攷誌稱誕生於紹興丁巳享年五十有二丁巳爲高宗紹興七年則當卒於孝宗淳熙十五年此誌蓋光宗以前所刻

趙若恭墓誌銘

多宋承議郎大理評事趙公墓誌銘

有宋故承議郎行大理評事添差通判泉州趙公墓誌銘

番

陽

洪師中撰

儒林郎温州路總管府推官謝好義書

承直郎平江路總管府判官任從政篆額

趙公

安行諱若恭其先汴人建炎何諱定之公南遷

爲温州因寓邑樂清曾大父諱彥譯承節郎累贈通奉大夫大父諱立夫寶章閣直學士通奉大夫永嘉郡開國侯食邑一千一百戶贈金紫光祿大夫少師父諱時詒直徽猷閣朝請大夫太府寺卿公年二十以門功除臨安新城尉三年司法蘄州居太府卿憂不果行服闋明年爲常州武進丞攝宜興令宜興豪猾周辛其黨樂大五等居環隘而城前棧大坑爲出入道二十年公賦不輸吏捕之則決水漂棧捕卒盡陷死及上其罪而親舊熾要路舐陷輒至公至曰此不殄奈何令民卽狀事聞府尋以新令至還武進會趙與積爲常辟攝司理屈僉廳遂白與積選吏率甲士焚其所盡獲之獄成聞上奉敕戮辛等二十餘人

以徇能名聞除澗西提刑司提幹獄有吳良嘗姦姣
縊死吏進牘夜讖風滅燭燃隨滅公恠輟而寐夢一
姥謂曰妾吳良嫂也冀爲理冤獄旦日核之乃良兄
正通婦妻憤而縊正以妻前三日嘗爲良所詈陰遷
尸掛良外戶因坐良公以事白提刑良獲脫民祠公
治西是年舉進士舉刑法銓當大理評事權臣賈佖
道嫉之故授福建提刑司檢法三年平反莊綰等獄
二十餘提刑趙崇機述以上上嘉之以大理評事除
公添差通判泉州賜緋銀魚袋時以就宏詞試未果
往旣而有邊事察訪使秀王辟公機宜帥師守台州
及而城陷遂不仕明年丁丑五月己亥卒年三十六
積官承議郎娶陳氏封安人子嗣僊嗣倚嗣仁嗣傳

孫次誠公嘗葬邑西山至順壬申九月壬午次誠遷之與陳氏合葬盧與山以父嗣仁母梁氏附謂余與公同出仕且深相知以狀來請銘余銘曰

外炳武文忠貞內持之德既豐之職匪微雄
□大宮曰公我資厥謀厥猷克邁乃司姦殲
冤清神人目歸孰簸厥政沮公徐徐后曰嘉
績汝翼汝爲天既輟遇早殞惟宜嗟我云壽
惟以永悲

王□□刊

右宋趙若恭墓誌元至順三年所刊石高三尺七寸廣二尺四寸誌文凡二十七行行三十字篆額七行行三字墓在樂清城西二十里峽門東米篩

河前山里許地舊名盧與趙氏裔孫相承以每年
上巳日祭墓故俗謂之初三墳碑石尙完好傳君
省三偕其門人劉如山茂才有阜訪得之拓以示
余謹据補錄

孫詒讓案若恭及祖立夫父時詒子次誠隆慶樂
清縣志人物並有傳傳中所述事蹟並與誌合蓋
卽据誌文修纂也誌首述其世系云建炎初定之
南遷爲温州因寓樂清攷宋史宗室世系表藝祖
子魏王廷美五世孫忠朝郎定之生公倚公倚生
彥譯彥譯生立夫立夫生時詒時詒三子若恭其
次也若恭諸子名表並不載此可以補其闕誌又
云察訪使秀王辟公機宜帥師守台州及而城陷

遂不仕明年丁丑卒攷宋史忠義傳嗣秀王與樸
德祐二年爲浙閩廣察訪使北兵逼浙東乃命與
樸出瑞安與守臣方洪共任備禦蓋與樸駐温州
時別遣若瑟以兵守台州甫至而城已陷也若瑟
卒于丁丑爲宋端宗景炎二年至至順三年乃遷
葬盧輿距若瑟之卒已五十六年矣篆額添差作
沾差者說文水部無添字其沾字注云水名出壺
關東入淇一曰沾益也徐鼎臣注云今別作添非
据此是古無添字其增益之義當作沾此碑額爲
任從政所書尙能恪守許義亦足嘉也

東甌金石志

卷十二

三

東甌金石志卷十二

郭博古